

Paulas ke tjetthie Efese ke iesaai log khaatien

Pahielbaat

Parmeswar ke pathaawal waala Paulas ie tjetthie liekhies raha djab oe Roma sahar me raha. Hoewa par oe aapan iesaai ke bieswaas dwaara djahal me raha.

Ie tjetthie Efese sahar ke iesaai log aur bhie oe diehaat ke ekwan iesaai log ke khaatien liekhal hai.

Eman sab se barka baat hai kie Parmeswar sansaar banaawe se pahiele salaah karies raha doenia bhar ke manai log ke mauka dewe ke okar goessa me se batje ke. Na khaalie aapan tjoenal waala djaaties Israel ke manai log Kriest me bieswaas kare ke dwaara batj djaai sake hai, bakie doesar djaaties log bhie. Ie baat dher baries tjiepaawal raha. Bakie djab tem aail tab Parmeswar ie baat aapan pathaawal waalan ke djanaais. Paulas oelog me se ekgo raha. Aur ie tjetthie me oe ie baat ke biese me liekhies hai. Na khaalie oe tem ke iesaai log khaatien, bakie sab parhe waalan khaatien bhie.

Tjetthie ke soeroe

1 ¹Ham Paulas baaties aur ie tjetthie liekhiela. Parmeswar hamke ek Jiesoe Kriest ke pathaawal waala banaais hai.

Ie tjetthie Kriest Jiesoe ke alag karal waala bieswaasie log khaatien hai djaun Efese sahar me rahe hai.

²Pieta Parmeswar aur Prabhoe Jiesoe Kriest toelogke bhalaai kare aur sjaantie dewe.

Parmeswar ke aadar karie dja!

³Parmeswar ke aadar howe! Oe hamlogke Prabhoe Jiesoe Kriest ke Baap hai. Okare dwaara oe hamlogke har ek rakam swarag me ke aasies deis hai. ⁴Doenia banaawe se pahiele Parmeswar hamlogke tjoen tjoekal raha Kriest se ek howe khaatien, djeme hamlog khaalie okar khaatien aur bhie be-daag ke rahie. ⁵Oe prem karke salaah karies Jiesoe Kriest

dwaara hamlogke aapan larkan banaawe khaatien. Aisane oke attjha lagal aapan hiettjha poera kare ke ⁶djeme okar goen gaawal djaai okar biesaal bhalaai khaatien djaun oe hamlogke aapan pjaara Beta dwaara karies hai.

⁷Okar khoen dwaara hamlogke tjhoetkaara aur paap ke tjhama mielal hai. Okar bhalaai hamlogke khaatien ketana biesaal hai! ^{8,9}Oe hamlogke aapan tjhiepal sotj-bietjaar djanaais hai kie oke attjha lagat raha aapan hiettjha Kriest ke dwaara poera kare ke. Aur oe hamlogke djaada gjaan aur boeddhi deis hai. ¹⁰Oe maange hai aapan tem par swarag me aur dhartie par sab tjiedj Kriest ke oeppar saupe djeme oe sab ke Barkwa rahe.

¹¹Aur hamlog Kriest se ek hoike okar hak me bhaag lebe. Parmeswar ie tjiedj dher dien pahiele sallaah karies raha, aur oe hardam aapan waada poera kare hai. ¹²Israel ke bieswaasie logan Kriest ke aawe se pahiele oke agorat raha djeme oesab aapan tjaal-tjalan se okar maahaanta dekhaaike okar goen gawaawe. ¹³Aur tohoelogan Kriest me saamiel hoi gaile baate. Toelog okar biese me sattja khoes khabar soenke batj gaile hai. Aur dekhaawe khaatien kie tohoelog bieswaas kare lagale aur okar djaatие hoi gaile hai Parmeswar aapan Pawietr Aatma toelogke diel me pathaais hai djaise oe waada karies raha. ¹⁴Okar Pawietr Aatma ke dwaara hamlog djaaniela kie

ek dien Parmeswar hamlogke hak bchie deiga. Okar Pawietr Aatma saboeth hai kie oe hamlogke aapan djaatие ghat ekdam se tjhoetkaara deiga, djeme okar maahaanta ke biese me okar goen gaawal djaai.

Paulas ke praatna samaadj khaatien

^{15,16}Ham soenlie hai kaise toelog Prabhoe Jiesoe me bieswaas kare hai aur sab iesaai ke bhaai-bahien ke pjaar kare hai. Ovie se ham Parmeswar ke hardam dhanbaad deila. ¹⁷Pieta Parmeswar hamlogke Prabhoe Jiesoe Kriest ke Baap hai aur oe bahoet maahaan hai. Ham praatna kariela kie okar Pawietr Aatma toelogke gjaan dewe aur toelogke dekhaawe kie oe Ke hai djeme toelog oke khoeb thiik se djaan sakihe. ¹⁸Ham praatna kariela kie toelogke andar me ekdam andjor hoi djaai djeme toelog samadjh sakihe kie toelog kaun barhia djiewan agore hai aur ekwa alag karal waalan ke sanghe ketana biesaal hak paawe khaatien bolaawal gaile hai. ¹⁹Aur bchie kie oe Jiesoe ke bieswaasie log ke barka barka saktie se sahaaita kare hai. ²⁰Oe aapan biesaal saktie se Kriest ke djie oethaais aur swarag me aapan dahiena bagal baithaais hai. ²¹Hoewa par oe har ek hoekoem aur raadj aur saktie se barka hai. Okar naam sab doesar naam se barka hai, na khaalie ie djoeg me bakie aane waala djoeg me bchie. ²²Pieta Parmeswar sab koetjh okar gor ke nietje kar deis hai aur oke sab tjiedj ke sab se maahaan Prabhoe banaaike iesaai

ke samaadj bhar ke dei deis hai bieswaasie log ke Barkwa ghat. Oe djaise oesabke moerie hai,²³ aur iesaai ke samaadj okar dehie ghat hai. Ek moerie biена dehie poera na hai, aur ek dehie biена moerie bhie na. Aur Kriest saara sansaar me sab tjiedj ekdam se poera kare hai.

Parmeswar ke bhalaai

2 ¹Toelog bhie paapie ke djiewan bietaawat rahiele. Toelog Parmeswar ke baat na soenat rahiele aur okar aakhie me djaise maral manai logan rahiele. ²Toelog doenia bhar ke manai log ghat kharaab rasta par tjalat rahiele aur toelog saitaan ke baat soenat rahiele. Oe aasmaan me sab bhoet-paret log ke barkwa hai, aur sab manai log ke oeppar raadj tjalaawe hai djaun Parmeswar ke baat na maane hai. ³Aur hamlog pahiele bhie na maangat rahielle Parmeswar ke baat soene. Hamlog aapan man waala, aapan laalietj aur aapan kharaab sotj-bietjaar poera karat rahielle. Ohie se Parmeswar ke goessa hamlogke oeppar raha.

⁴Bakie Parmeswar ke daaja etana barka hai kie oe hamlogke bahoet pjaar karies hai. ⁵Tjaahe hamlog sab koi aapan paap ke dwaara maral manai ghat rahielle, tabbo djab Parmeswar Kriest ke djie oethaais, tab oe toelogke diel me ek naawa djiewan oetpan karies. Hamlog Parmeswar ke bhalaai dwaara okar goessa me se batj gailie. ⁶Oe hamlogke

Kriest ke sanghe djie oethaaike naawa djiewan aur swarag me oetja dardja deis hai. ⁷Oe hamlogke Kriest Jiesoe dwaara daaja karies sab aane waala djoeg me dekhaawe khaatien kie okar bhalaai ketana barka aur biesaal hai.

⁸Toelog bhalaai ke kaaran aur bieswaas dwaara batj gaile, na toelogke kiemat se, bakie ie Parmeswar ke ek daan hai ⁹djeme koi na aapan bhalaai par barwargie kar sake. ¹⁰Oe agwe se sotj bhail raha kie hamlog kaun bhala kaam karab. Aur oe hamlogke banaais aur Jiesoe Kriest se ek karies ie bhala kaam kare khaatien.

Sab djaatie ke iesaai ek hai

¹¹Jaad karle rahiehe kie toelog pahiele Parmeswar ke djaatie na rahiele. Aur toelogke hakiekat ke tjienha na raha. Ohie se Israel logan toelogke toetj maane hai aur „be-hakiekat waalan” bolaawe hai. ¹²Toelog pahiele biена Kriest ke rahiele. Toelog Israel des ke na rahiele. Parmeswar ke baat-tjet toelogse na bhail raha, ohie se toelog doenia me biена waada, aasa aur Parmeswar se djieejat rahiele. ¹³Aur tjaahle pahiele Parmeswar se doer rahiele, tabbo Jiesoe Kriest ke khoen dwaara toelog ab okare me saamiel baate.

¹⁴Ohie hamlogke sjantie hai. Oe Israel ke iesaai log aur ekwan iesaai log ke ek djaatie banaais hai. Aur djaun doesmanie oelogke bietj me ek dewaal ghat raha, oe toer deis hai.

¹⁵Oe aapan maut dwaara Israel ke dharam ke kaanoen aur hoekoem bekaamiel kar deis hai. Aisane oe doe rakam iesaai log ke apane se ek karies hai. Tab oesab apane apane me djaise ek naawa iensaan hoi gail hai. Aisane sjantie bhail. ¹⁶Djab Kriest kroes par maral tab oe aapan maut dwaara oelogke doesmanie ke hataai deis aur oesabse aur Parmeswar se ek karwaai deis. Oe doe rakam manai ke ek iesaai ke samaadj banaais, djaise ek dehie. ¹⁷Toelog Parmeswar ke na djaanat rahiele aur doesar log oke auro attjha se djaanat raha. Tab Kriest aaike khoes khabar ailaan karies kie toelog sab koi apane me ek hoi gail hai. ¹⁸Okar dwaara doe rakam iesaai ekahie Pawietr Aatma ke sahaaita se Pieta Parmeswar se praatna kar sake hai. ¹⁹Ohie se toelog ab samaadj me pardesie aur gair log na baate, bakie toelog Parmeswar ke djaatие aur okar ghar waalan hoi gaile hai.

²⁰Ek mahal banaawe khaatien manai logan pahiele djamien khodke ieta baithaawe hai. Oisane Kriest ke pathaawal waalan aur sanesian okare biese me siekhaais hai. Aur djaise ieta ke paawa ghar bhar ke samharle rahe hai, oisane samaadj me Kriest Jiesoe sab se barka Waala hai. ²¹Okar dwaara iesaai ke samaadj ban dja hai djaise ekgo bahoet djabar Prabhoe ke pawietr mahal. ²²Aur tohoelog Pawietr Aatma dwaara ie Parmeswar ke mahal baate.

Doei rakam iesaai ekahie hak paaiga

3 ¹Ham toelog khaatien Jiesoe Kriest ke biese me partjaan

kare ke dwaara djahal me baatie. Ham siekhaawat rahieli kie tohoelog, tjaahae Israel ke djaatie me ke na baate, tabbo Parmeswar khaatien alag karal gaile hai.
²Toelog soenle rahiele kie Parmeswar hamme aapan bhalaai dwaara ie partjaar ke kaam deis raha toelogke madat kare khaatien.
³Djaun baat ham tjhota roep me ie tjetthie me liekhlie hai, oe tjhiepal raha, bakie ab Parmeswar hamme dekhaais hai. ⁴Ie baat parhke toelog samadjh sakieh kaise ham Parmeswar ke gahier matlab ke biese me djaan gailie. ⁵Ie baat hamlogke baap-daada logan ke na samdjhawaal gail. Bakie ab Pawietr Aatma aapan pathaawal waalan aur sanesia log ke djanaais hai. ⁶Aur ie gahier matlab hai kie Parmeswar Israel ke iesaai log aur ekwa iesaai ke saathe saath hakdaar bana deis hai. Djab oelog khoes khabar soenke bieswaas kare lagal, tab oesab bhie Jiesoe Kriest me saamiel hoi gail. Ohie se Israel ke bieswaasie log me saamiel hoike ohoesab ab Parmeswar ke waada me bhaag lewe hai.

⁷Aur ham Parmeswar ke ek naukar hoi gailie ie khoes khabar soenaawe khaatien. Oe hamme bhalaai karke ie dardja deis hai, aur ham aapan kaam okar saktie se kariela. ⁸Ham tjaahae sab se tjhota iesaai baatie, tabbo Parmeswar aapan bhalaai dwaara hamke tjoenies hai gair djaatие logan se okar khoes khabar bataawe ke. Ham oesabse bataaila kie Kriest ketana maahaan hai aur

kie okar dwaara hamlog sab koi ke kaun kaun barhia tjiedj mielal hai. Oe etana biesaal hai kie koi na sotj aur samadjh sake hai! ⁹Parmeswar saara sansaar ke banaawe Waala hai, aur ab talak oe sab djoeg ke tjhiopal baat na dekhaais hai. Aur ham safaa se siekhaai sakiela kie oe aapan sotj-bietjaar kaise poera kariega. ^{10,11}Djaun oe hardam se sallaah karies raha, ie bietjaar oe Prabhoe Kriest Jiesoe ke dwaara poera karies hai. Aur ab oe maange hai kie sab aasmaan ke raadj aur hoekoem tjalaawe waalan iesaai ke samaadj dwaara djaan djaai kie oe aapan waalan khaatien ka karies hai. Tab oesab samdjhiega kie okar biesaal gjaan ketana rang-bierang tjamke hai.

¹²Hamlog ose ek baatie aur okare me bieswaas kariela. Aur hamlog bharosa karke aur be-dar se ose batiaai sakiela. ¹³Owie se ham toelogse bientie kariela kie tjaahie hamke doekh oethaawe ke pare hai toelogke khaatien, tabbo toelog hiemmat na hariehe.

Kriest ke biesaal pjaar

¹⁴Djab ham Pieta Parmeswar ke biesaal sotj-bietjaar ke biese me sotjiela tab ham gaathie par gieriela. ¹⁵Oe swarag aur dhartie ke sab koel ke Pieta hai. ¹⁶Oe bahoet biesaal aur maahaan hai, owie se ham praatna kariela kie oe toelogke aapan Aatma ke dwaara saktie dewe djeme toelogke andar djabar hoi djaai. ¹⁷Aur bhie kie Kriest toelogke bieswaas dwaara toelogke diel djaise aapan ghar

banaawe. Tab toelogke diel etana pjaar se bhar djaaiga kie toelog sab tjiedj khaalie prem se kariehe. ¹⁸Ie rakam se toelog ekwan iesaai log ke sanghe samadjh paihe kie Kriest ke pjaar ketana tjakala, lamba, oetja aur gahier hai. ¹⁹Tab toelog djaan djaihe kie Kriest toelogke ketana aur kaun rakam se pjaar kare hai, tjaahie koi na okar pjaar ekdam se samadjh paaiga. Ie sab tjiedj Howe ke tjaahie djeme Parmeswar na khaalie toelogke diel ke ek toekkara rahe, bakie ekdam se bhar dewe.

²⁰Parmeswar ke saktie hamlog me hai aur ese dekha hai kie oe hamlogke praatna aur sotj-bietjaar se bahoet kar sake hai. ²¹Samaadj me sab Kriest Jiesoe ke saamiel waalan ab aur sab aane waala djoeg khaatien oke maahaan maane! Ha, aisane to hai.

Samaadj log ke tjaahie ek man rahe ke

4 ¹Ham Prabhoe ke djahalia ghat toelogse bientie kariela kie toelog aapan djiewan bietaihe djaise Parmeswar ke tjoenal waalan ke tjaahie bietaawe ke. ²Apene ke barka na maan, aur doesar koi ke doekh na de. Dhieradj se rahoe aur ek doesare ke prem se sahiehe. ³Pawietr Aatma hamlogke ek djaatие banaais hai. Owie se kausies kar okar sjantie ke dwaara miel-djoelke rahe ke. ⁴Hamlog bieswaasie ghat djaise ek dehie baatie. Ekahie Aatma hamlog sab koi ke diel me rahe hai.

Hamlog bchie ekahie barhia tjiedj agoriela djaun Parmeswar waada karies hai. ⁵Hamlogke khaatien khaalie ek Prabhoe hai, ek rakam bieswaas aur ek rakam dopoe. ⁶Hamlog ekahie Pieta Parmeswar ke maaniela, aur oe hamlog sab koi ke oeppar raadj tjalaawe hai, hamlogse aapan bhala kaam karwaawe hai, aur hamlog sab koi ke diel me rahe hai.

⁷Tabbo hamlogke doesar doesar rakam bhalaai mielai hai, djetana Kriest har ek ke dewe hai. ⁸Parmeswar ke poestak me liekhal hai kie:

„Oeppar djaite me oe dher baanhil waalan ke legali aur manai logan ke rakam rakam daan deis.”

⁹Djab liekhal hai kie oe oeppar gail, tab ekar matlab hai kie oe pahiele nietje aail raha. ¹⁰Aur oe djaun nietje aail raha, ohie swarag ke swarag se oetja gail sab tjiedj ekdam poera kare khaatien. ¹¹Oe pathaawal waalan ke, sanesian ke, khoes khabar ke partjaarie log ke, barkwan ke aur siekhaawe waalan ke deis hai. ¹²Oe oesabke baithaais hai bieswaasie log ke tajaar kare ke okar khaatien kaam karke doesare ke sahaaita kare ke. Ie rakam se samaadj bhar ke iesaai log ke bieswaas hardam barhat djaaiga. Oesab to Kriest ke dehie ghat hai.

¹³Tab hamlog aapan iesaai ke bieswaas me ek man se rahab aur Parmeswar ke Beta ke ekdam se djaan djaabe. Aur hamlog pakkal iesaai hoike poera taur

se Parmeswar ke oeppar bharosa karab djaise Kriest bchie. ¹⁴Tab hamlog tjhota larkan ghat na rahab djaun ke man haldie se badal dja hai. Aur hamlog har ek rakam djoetthe ke siektjha aur tjalaak baat ke dwaara na bhatkaawal djaabe. ¹⁵Bakie hamlog khaalie sattjaai ke rasta par tjalke doesare ke pjaar karab. Aisane hamlog hardam Kriest ke ner hoi djaab. Oe hamlogke samaadj ke Barkwa hai, djaise dehie ke ek moerie. ¹⁶Aur djaise ek dehie me har ek hiessa aapan aapan kaam karke dehie bhar ke ek banaawe hai aur sewa kare hai djaise moerie ke sotj hai, aisane djab sab iesaai ek man me rahieke doesare ke pjaar karie, tab Kriest ke samaadj pjaar dwaara barhat djaaiga.

Iesaai log ke naawa rakam djiewan

¹⁷Ham Prabhoe ke hoekoem se toelogke khaatien liekhiela kie toelogke na tjaahie aapan djiewan be-bieswaasie ghat bietaawe ke. Oesabke sotj-bietjaar be-kaamiel hai ¹⁸aur oelogke diel andhiaar hai. Oelog Parmeswar ke sattja djiewan ke biese me koetjh na djaane hai. Oesab aapan diel band kar deis hai. ¹⁹Aisan manai logan ke koetjh gam na hai kie kaun tjiedj attjha hai aur kaun tjiedj na. Oesab aapan kharaab laalietj poera karke har ek rakam be-saram kaam kare hai.

²⁰Bakie toelog ekdam doesar rakam siekhle hai. Toelog Kriest ke djaan gaile hai. ²¹Toelog okar biese me soenle aur siekhaawal gaile hai okar tjela ghat rahe ke.

Oe aapan djiewan me dekhaais hai kaise hamlogke okar sattjaai me rahe ke tjaahie. ²²Ekar matlab hai kie toelogke tjaahie aapan kharaab man djaise mail kapra oetaar dewe ke. Oe toelogke laalietj dwaara bharmaaikе barbaad karwaaи dewe hai. ²³Toelogke tjaahie aapan sotj-bietjaar ekdam se badale ke. ²⁴Tab aapan naawa man djaise naawa kapra pahien leihe djaun ke Parmeswar banaais hai. Aise toelog poera manai ghat sattjaai se aapan djiewan bietaihe.

²⁵Djhoeth na bol, bakie doesare se khaalie satj baat batia. Hamlog to ek samaadj baatie, djaise ek dehie. ²⁶Djab toe goessaai djaihe, tab batjaaike rahiehe kie toe paap na kariehe. Aur toelogke tjaahie aapan goessa soeroedj doebe se pahiele pataawе ke. ²⁷Saitaan ke mauka na de tose koetjh kharaabie karwaawе ke. ²⁸Dje tJOR hai, oke tjaahie ab se tJORIE na kare ke. Bestar hai kie oe barhia kaam karke aapan paisa batore. Tab oe garieb logan ke bhie koetjh dei sakiega. ²⁹Kabhie kharaab baat na bol. Bakie djab toe koetjh attjha tjiedj bolke koi ke sahaaита kar sakiehe, tab bol de. Tor baat ke dwaara Parmeswar okar bhalaai kariega. ³⁰Parmeswar ke Pawietr Aatma ke oedaas na kar. Parmeswar oke toelogke diel me pathaais hai djanaawe khaatiен kie ek dien toelog paap ke saktie me se ekdam se batjaawal djaihe. ³¹Na bhoen-bhoena, oep paddar na kar, goessa ke djar na dharle rahoe, hauwa es baat na kar, ek

doesare ke bedjatie na kar aur sab doesar kharaabie aapan djiewan me se hataai de. ³²Bakie hardam ek doesare ke prem kar, moesiebat me haath lagaaw, aur tjama kar, djaise Parmeswar Kriest ke dwaara toelogke bhie tjama karies hai.

Soedhaare khaatiен baat

5 ¹Toelog Parmeswar ke pjaara larkan baate, ohie se okare ghat rahoe. ²Pjaar karke aapan djiewan bietaihe djaise Kriest toelogke bhie pjaar kare hai. Oe to apene ke hamlog khaatiен kroes par baliedaan karies raha, aur ie Parmeswar ke bahoet barhia lagat raha djaise ekgo attjha mahake waala baliedaan.

³Bakie tjhatjhoendar ke kaam, har ek rakam be-saram tjiedj aur haahie se ekdam doer rahiehe. Toelog to Parmeswar ke khaatiен alag karal gaile hai. ⁴Ohie se toelog be-saram aur be-baat ke baat na bol. Bestar toelog dhanbaad deihe. ⁵Toelogke tjaahie thiек se djaane ke kie tjhatjhoendar logan, be-saram waalan aur paisa ke haahie logan khaatiен Kriest aur Parmeswar ke raadj me djagaha na hai. Dje haahie hai, oe paisa ke djaise Parmeswar maane hai.

⁶Djhoeth baat se na bahakaawal dja. Parmeswar ke goessa oesabke oeppar aaiga djaun aisan kharaabie kare hai aur na maange hai okar baat soene. ⁷Aisan manai log se sanghat na kar. ⁸Pahiele toelogke diel me andhiaar raha, bakie ab toelog Prabhoe se ek hoike andjor

me baate. Olie se toelogke tjaahie okar andjor rasta par tjale ke. ⁹Tab dekhaaiga kie toelog bhala kaam kare hai, be-kasoer aur sattjaai se rahe hai. Ie sab to okar phal hai.

¹⁰Kausies karke djaan dja kie kaun tjiedj Parmeswar ke attjha lage hai aur kaun tjiedj na. ¹¹Aur kharaab kaam me bhaag na leuhe. Ie to be-kaamiel hai. Dje tabbo aise kare hai, oe andhiaar me tjale hai. Toelog bestar dekha deihe kie oelog ka kare hai. ¹²Koetjh manai log tjoeppe tjoeppe etana be-saram kaam kare hai kie hamlog sarmaaila ekare biese me batiaai ke. ¹³Bakie djab andjor me dekhaawal dja hai, tab sab koi djaan djaai. Aur andjor me tjale khaatien oesabke aapan tjaal-tjalan badale ke parie. ¹⁴Ie tjiedj ke biese me koi liekhies hai kie:

„Dje soetal hai, oke tjaahie djaag djaai ke aur maral manai me se djie oethe ke. Tab Kriest oke andjor ke rasta dekhaaiga.”

¹⁵Olie se batjaaike rahiehe kie toelog aapan djiewan bhoettjar ghat na bietaihe, bakie akkiel se. ¹⁶Hamlog kharaab tem me rahiela. Olie se har ek mauka kaam me laaw bhalaai kare khaatien. ¹⁷Be-bietjaar se na rahiehe, bakie kausies kariehe samdjhe ke kie Prabhoe ka maange hai. ¹⁸Na aise wien piehe kie nasaai djaihe aur oeppaddar matjaawe lagiehe. Bakie Pawietr Aatma se hardam bharal rahoe aur ¹⁹ekwan ke sanghe diel bhar se Parmeswar ke khaatien bhadjan, gaana aur giet gaaw.

²⁰Aur hamlogke Prabhoe Jiesoe Kriest ke naam se Pieta Parmeswar ke hardam sab tjedj khaatien dhanbaad de.

Apane ke nietja kar

²¹Toelog Kriest ke barka maane hai, olie se apante ke ek doesare se nietja maan.

²²Biehautie logan, djaise toelog apante ke Prabhoe ke aage nietja kare hai, oisane bhie apante ke aapan aadmie ke aage nietja kar.

²³Kriest aapan samaadj ke barkwa hai aur oke aapan dehie ghat batjaawe hai. Aisane ek aadmie aapan aurat ke barkwa hai. ²⁴Aur djaise ek samaadj apante ke Kriest ke aage nietja kare hai, oisane biehautie logan ke tjaahie har ek tjiedj me apante ke aapan aadmie ke aage nietja kare ke.

²⁵Biehauta logan, aapan aurat ke pjaar kar djaise Kriest aapan samaadj ke etana pjaar karies hai kie oe apante ke baliedaan kar deis hai. ²⁶Oe oke alag karies hai apante sanghe rahe khaatien. Okar baat djaise paanie hai aur ekare dwaara samaadj safra karal dja hai.

²⁷Oe maange hai kie okar samaadj djaise doelahien okar aage ekdam se barhia rahe, bienza daag kie to tjoengaral se. Oke tjaahie pawietr aur poera rahe ke.

²⁸Aisane biehauta logan ke tjaahie aapan aurat ke pjaar kare ke djaise aapan dehie ke. Dje aapan aurat ke tjaahie hai, oe apante ke bhie tjaahie hai. ²⁹Koi to aapan dehie ke na djare hai. Bakie sab koi kha hai aur apante ke

sewa kare hai, djaise Kriest aapan samaadj ke bhie sewa kare hai.
30 Hamlog okar dehie ke toekkara toekkara baatie. **31** Ohie se ekgo mardaana ke tjaahie aapan maai-baap ke tjhorke aapan aurat se ek howe ke djeme oe doeno ek dehie hoi djaai. **32** Ie baat ke gahier matlab pahiele tjhiopal raha. Aise Kriest aur okar samaadj ke ekta dekhaawal dja hai. **33** Ohie se samadjh dja kie har ek ke tjaahie aapan aurat ke pjaar kare ke djaise apane ke. Aur biehautie logan ke tjaahie aapan aadmie ke barka maane ke.

Kaise ek doesare se rahe ke tjaahie

6 **1**Larkan, Prabhoe ke sahaaita se aapan maai-baap ke baat soen. Ie thiek hai. **2,3**Oe bolies hai kie: „Aapan maai-baap ke barka maan, tab toelog dhartie par dher dien soekh se rahiehe.” Ie pahiela hoekoem hai djaun me ek waada hai.

4 Aur baap log, aapan larkan ke na goeswaaw, bakie oelogke aise posiehe kie oesab Parmeswar ke baat soene.

5 Goelaam log, toelogke tjaahie aapan sardaar ke ieddjat karke okar baat soene ke. Djaise toelog Kriest ke barka maane hai, oisane aapan sardaar ke bhie safa diel se barka maan, **6**na khaalie okar aage, bakie bhie djab oe toke na dekhe hai. Ohie se Kriest ke goelaam ghat aapan kaam na kariehe dekhaawe khaat, bakie diel bhar se Parmeswar ke hiettjha poera kare khaatien. **7**Aapan sab kaam

khoesiaalie se kar, na manai khaat bakie Parmeswar ke khaatien.

8 Aur toelog djaane hai kie tjaahie goelaam kie na goelaam, sab koi ke bhala kaam ke ienaam Parmeswar deiga.

9 Aur sardaar log, toelogke tjaahie aapan goelaam logan se bhie attjha se rahe ke. Oesabke dhamkie na de. Jaad kar kie toelogke aur oelogke Prabhoe swarag me rahe hai. Aur oe koi ke moeh na taake hai.

Soerdjaatie ke samaan

10 Ek tjiedj auro. Prabhoe ke oeppar bharosa kar, tab oe aapan biesaal saktie se toelogke dwaara aapan barka kaam kariega. **11** Ek soerdjaatie laraai djaai se pahiele aapan samaan tajaar kare hai. Aisane toelogke tjaahie apane ke tajaar kare ke saitaan se djiet lewe ke. Aur Parmeswar dher tjiedj deis hai kaam me laawe khaatien.

12 Hamlogke na iensaan logan se lare ke pare hai, bakie bhoet ke barkwan aur saitaan ke saktie waalan se. Ie andhiaar tem me oesab doenia par aur aasmaan me hoekoem tjalaawe hai. **13** Ohie se djab hamlogke doesman soeroe kariega laraai kare ke, tab batj djaai khaatien toelogke tjaahie Parmeswar ke sab dewal tjiedj kaam me laawe ke. Tab toelog aapan kaam poera karke djiet leihe.

14 Thara how aur Parmeswar ke sattjaai djaise soerdjaatie ke tjamotie lagaaw. Hamlog bieswaas kariela kie Parmeswar hamlogke be-kasoerie aur apane se ek

banaais hai. Ie bieswaas tor diel aar kariega djaise soerdjaatie ke djhielam, jaane loha ke soth.¹⁵ Aur djaise toe djoeta pahiene hai kahoe djaaai ke, oisane apane ke tajaar kar doesare ke khoes khabar soenaawe ke kaise ek iensaan Parmeswar se ek hoi sakiega.¹⁶ Ekare saath Parmeswar ke oeppar bharosa kar. Bieswaas kare djaise soerdjaatie ke dhaal hai. Djab saitaan aapan djarat tier daagiega, tab tor bharosa dwaara boetaawat djaaiga.¹⁷ Parmeswar toke paap aur sadja me se batjaais hai. Ie baat se aapan sotj-bietjaar aar kar djaise soerdjaatie aapan loha ke topie pahiene hai. Aur Parmeswar ke baat ek talwaar ghat kaam me laaw. Pawietr Aatma ese saitaan ke djietiega.

¹⁸Aur bhie har ek mauka par Pawietr Aatma ke sahaaita se sab tjedj ke biese me praatna karte rahiehe. Sab iesaai log khaatien hardam bientie kariehe biena hiemmat haare se.¹⁹ Aur hamaar khaatien bhie praatna kar kie Parmeswar hamme mauka par

aapan baat dei okar tjiepal khoes khabar be-dar se bataawe khaatien.²⁰ Oe hamke pathaais hai aapan khoes khabar soenaawe khaatien, aur ohie se ham ketie se baanhalaat. Djab toelog aise praatna kariehe tab ham biena dar se khoes khabar bataai sakab djaise hamke tjaahie bataawe ke.

Tjetthie ke ant

²¹Toelog bhie maange hai djaane kie ham kaise baat. Ohie se ham aapan pjaara bhaai Tiekiekas ke pathaaila. Oe Prabhoe ke kaam me ek bharosaadaar sahaaita kare waala hai aur oe toelogse sab baat bataaiga.²² Ham oke toelogke paas pathaaila djeme toelog hamaar haal djaan djaaihe aur oe toelogke diel me tieha dewe.

²³Bhaai-bahien, Pieta Parmeswar aur Prabhoe Jiesoe Kriest toelogke bieswaas ke sanghe sjaantie aur prem dewe.

²⁴Dje hamlogke Prabhoe Jiesoe Kriest ke hardam tjaahat rahe hai, Parmeswar ke bhalaai okar saath rahe.